

LA MAGJIE DAL FURLAN

La gnove campagne di informazion de ARLeF par une siele cussiente dal plurilinguism a scuele

“La magjie dal furlan” e jentre intes fameis de regjon su lis alis di une pavee. A son chestis lis peraulis e i simbui sielts de ARLeF (Agjenzie Regjonâl pe Lenghe Furlane) par une campagne impuartante di sensibilizazion indreçade ai gjenitôrs par stimolâju a sielzi l’insegnament de marilenghe pai propriis fîs iscrirts ai Istitûts Comprensîfs e aes scuelis paritariis dal teritori furlanofon. Il proget al gjolt dal supuart dal Assessorât regjonâl ae Istruzion e al viôt la colaborazion dal Uffici Scolastic Regjonâl. La campagne e je stade inviade ae fin dal 2016 sui social network e cu la proiezion intes salis cinematografichis di un spot cuntun lengaç emozionâl fuart. In plui al è stât distribuît un depliant bilengâl (furlan-talian), cun tantis informazions sui vantaçs e su lis oportunitâts ufiertis dal insegnament e dal aprendiment de lenghe furlane intes scuelis. Une vere e proprie vuide pai gjenitôrs (distribuide in 60 mil copiis), finalizade a fugâ cualchi pregiudizi e a disvilupâ une cussience plui fuarte su la utilitât formative di cheste siele prime de iscrizion a scuele. Une siele a vuê condividue di 31.526 arlêfs des scuelis pe infanzie e des primariis des provinciis di Udin, Gurize e Pordenon, vâl a dî il 73% dal numar totâl des iscrizions. Come che al sclarìs il President Lorenzo Fabbro “ducj i specialiscj a concuardin sul fat che i fruts bilengâl a imparin cun plui facilitât chês altris lenghis, tant che chê inglese, a àn plui cussience e



tolerance viers lis diversitâts e si costruissin un futûr plen di relazions e di oportunitâts professionâls. Inte nestre regjon la oportunitât di cressi bilengâl si pues cjapâ sù cun facilitât e in maniere spontanee”.

10 bogns motîfs par cressi i fruts cun plui di une lenghe, ancje chê furlane

I studis scientifics a dimostrin che une educazion al plurilinguism tai prins agns di vite e da ai fruts:

1. vantaçs no dome linguistics, ma ancje cognitîfs e metacognitîfs;
2. une oportunitât in plui e la pussibilitât di rinfuarcî la capacitât inteletive;
3. une competence plui alte te atenzion seletive e tal passaç di un compit a di chel altri;
4. la pussibilitât di imparâ cun plui facilitât altris lenghis, come l'inglês, il todesc, il sloven;
5. une cussience plui grande des culturis diferentis e di chei altris ponts di viste;
6. une cognossince e une tolerance plui grande pes diversitâts;
7. une plui grande adatabilitât e disponibilitât ai cambiaments;
8. une vision plui largje e gnovis prospetivis sul mont;
9. la capacitât di metisi in contat e di inserîsi in contescj sociâi diferents;
10. la abilitât di costruî un futûr plen di relazions ancje professionâls.

Par cure de ARLeF